

Bosna i Hercegovina
Federacija Bosne i Hercegovine
Federalno ministarstvo energije, rudarstva i industrije
Mostar

**Program
utroška sredstava Trajnog revolving fonda kod Union banke d.d.
Sarajevo, Federalnog ministarstva energije, rudarstva i industrije za
dugoročno finansiranje projekata putem dodjele kredita za 2017.
godinu**

Mostar, februar 2017. godine

1. UVOD

Federalno ministarstvo energije, rudarstva i industrije se od budžetske 2012. godine opredijelilo za dodjelu finansijskih sredstava, privrednim društvima, na kreditnoj osnovi, sa povoljnom kamatnom stopom, „grace periodom“ i minimalnom naknadom za obradu kreditnih zahtjeva, te dovoljnim brojem rata da iznos povrata sredstava bude prihvatljiv korisnicima kredita.

U 2014. godini je uspostavljen Trajni revolving fond kod Union banke d.d. Sarajevo, putem kojeg je u toku cijele godine otvoren Javni poziv za prikupljanje aplikacija za dodjelu povoljnih kreditnih sredstava.

Uspostavljanjem Trajnog revolving fonda kod Union banke d.d. Sarajevo, stvoren je novi impuls privredi kroz povećanje likvidnosti privrednih društava iz proizvodnog sektora.

Uvođenjem novih tehnologija povećava se konkurentnost BiH privrede na svjetskom tržištu, modernizira se i restrukturira prerađivačka industrija i ostvaruje proizvodnja proizvoda veće dodatne vrijednosti. Poticaj novim investicijama rezultira rastom industrijske proizvodnje koji na kraju rezultira otvaranjem novih radnih mjesta.

Ekonomska kriza je pokazala važnost industrije za privrednu stabilnost zemlje, zapošljavanje i slično.

Prerađivačka industrija Federacije Bosne i Hercegovine, kao najznačajniji dio privrede, se u svom razvoju susreće s brojnim ograničenjima, kao što su manjak stručnih kadrova, zastarjelost opreme, nedostatak programskih rješenja i drugo. Ulaganje u unapređenje proizvodnih procesa, razvoj novih proizvoda i pronalaženje novih tržišta, doprinosi tržišnoj konkurentnosti domaćih proizvoda i razvoju održive privrede.

2. PRAVNI OSNOV

- Projekat: Razvoj industrijske politike u Federaciji Bosne i Hercegovine, („Službene novine Federacije BiH“, broj 40/10);
- Akcioni plan za realizaciju projekta „Razvoj industrijske politike u Federaciji BiH“ 2016-2019 (Zaključak V. broj 91/2016 od 14.01.2016. godine);
- Strategija razvoja industrije tekstila, odjeće, kože i obuće u Federaciji Bosne i Hercegovine za period 2013-2023. godine („Službene novine Federacije BiH“, broj 65/13);
- Izmjene i dopune Akcionog plana 2013-2018. godine za realizaciju Strategije razvoja industrije tekstila, odjeće, kože i obuće u Federaciji Bosne i Hercegovine za period 2013-2023. godine (Zaključak V. broj 1823/2016 od 29.09.2016. godine).

3. ZAKONODAVNI OKVIR PROVEDBE PROGRAMA

- Odluka o davanju saglasnosti Federalnom ministarstvu energije, rudarstva i industrije za uspostavu Trajnog revolving fonda kod Union banke d.d. Sarajevo za dugoročno finansiranje projekata putem dodjele kredita – Trajni revolving fond („Službene novine Federacije BiH“, br. 27/14, 91/14, 106/14, 3/15 i 24/16);

- Zakon o izvršavanju Budžeta Federacije Bosne i Hercegovine za 2017. godinu („Službene novine Federacije Bosne i Hercegovine“, broj 104/16);
- Zakon o sistemu državne pomoći u Bosni i Hercegovini („Službeni glasnik BiH“, broj 10/12) i
- Uredba o namjeni, kriterijima i uslovima za dodjelu državne pomoći u Federaciji Bosne i Hercegovine („Službene novine Federacije BiH“, broj 99/13).

4. CILJ PROGRAMA

Cilj Programa utroška sredstava Trajnog revolving fonda kod Union banke d.d. Sarajevo, Federalnog ministarstva energije, rudarstva i industrije za dugoročno finansiranje projekata putem dodjele kredita za 2017. godinu (u daljem tekstu: Program), je stvaranje povoljnijeg poslovnog okruženja, kao i poboljšanje okvirnih uslova za poslovanje u svim dijelovima Federacije Bosne i Hercegovine, kroz realizaciju strateških ciljeva koji su usvojeni u dokumentu Razvoj industrijske politike u Federaciji Bosne i Hercegovine i Strategiji razvoja industrije, tekstila, odjeće, kože i obuće u Federaciji Bosne i Hercegovine. Poticanje privrednog rasta rezultira otvaranjem novih radnih mjesta stvaranjem konkurentnije privrede i povećanja obima proizvodnje izvoznih proizvoda s višom dodanom vrijednošću.

Provođenje pomenutih strateških ciljeva je izazov za sve privrednike bez kojih nema stvaranja konkurentne industrijske baze, u cilju osiguranja rasta i povećanja zaposlenosti u Federaciji Bosne i Hercegovine. Konkurentna i efikasna industrija primarno zavisi od sposobnosti same industrije da se neprekidno prilagođava i reaguje na promjene u okruženju, kao i da se prilagođava zahtjevima na tržištu.

U skladu sa pomenutim, očekivani efekti Programa su:

- rast broja novozaposlenih,
- rast produktivnosti radne snage,
- rast indeksa industrijske proizvodnje,
- uvođenje novih naprednih tehnologija i tehnoloških postupaka, kao i unapređenje postojećih tehnologija i tehnoloških postupaka i reinženjeringa,
- razvoj novih proizvoda, proizvodnih procesa ili usluga sa većom dodanom vrijednosti,
- uspostavljanje sistema kvalitete (CE znak, ISO standardi i drugo),
- povećanje konkurentnosti,
- porast prometa i
- poboljšanje općeg privrednog stanja.

5. NAMJENA POZAJMLJENIH SREDSTAVA

Ovaj Program je namijenjen privrednim društvima osnovanim po Zakonu o privrednim društvima („Službene novine Federacije BiH“, broj 81/15) s ciljem povećanja broja zaposlenih kroz provođenje aktivnosti ulaganja u modernizaciju i nabavku opreme, izgradnju novih proizvodnih objekata i proširenje postojećih, te modernizaciju tehnoloških procesa.

Na osnovu ovog Programa pozajmiti će se sredstva sljedećim sektorima industrijske proizvodnje:

- Metalna, elektro i automobilska industrija,
- Industrija građevinskog materijala i nemetala,
- Drvna, papirna i grafička industrija,
- Proizvodnja tekstila, odjeće, kože i obuće i
- Hemijska i farmaceutska industrija i industrija gume i plastike.

Pozajmljivanje sredstava vrši se u cilju:

- značajnog poboljšanja i modernizacije proizvodnje postojećih proizvoda, proizvodnih procesa koji daju proizvode s većom dodanom vrijednosti,
- širenja postojeće proizvodnje i izgradnje novih proizvodnih kapaciteta,
- izgradnje proizvodnih objekata koji podrazumijeva ulaganje u nove ili rekonstrukciju, adaptaciju i dogradnju postojećih objekata i postrojenja, te kupovinu novih proizvodnih hala, sa pripadajućom infrastrukturom i opremom, a koja su usko vezana uz proizvodnju,
- nabavke novih tehnologija koje doprinose unapređenju djelatnosti privrednog društva (mašine, postrojenja i oprema za proizvodnju, mjerni i kontrolni uređaji i instrumenti),
- nabavka informatičke opreme usmjerene ka proizvodnji,
- uvođenja validnog CE znaka,
- uvođenja Sistema kvaliteta u skladu sa standardima (serija ISO standarda, sistemima upravljanja zaštitom zdravlja i bezbjednošću na radu, potrebnih licenci za obavljanje proizvodne djelatnosti i sl.) i
- pokretanja značajnijih aktivnosti zasnovanih na promjenama sveukupnih proizvodnih procesa i stanja postojeće poslovne djelatnosti društva (reinžinjerin).

Pod ulaganjem se smatra ulaganje u materijalnu i nematerijalnu imovinu koja se odnosi na unapređenje procesa proizvodnje kroz razvoj novih proizvoda i unapređenje postojećih proizvodnih linija. Navedeno podrazumijeva i aktivnosti koje su započete najkasnije godinu dana (12 mjeseci) unazad od dana podnošenja zahtjeva za dodjelu sredstava po ovom Programu. Ponude, predračuni ili ugovori ne smiju biti od dobavljača ili izvođača koji je povezana osoba sa podnositeljem zahtjeva za dodjelu sredstava po Programu.

Povezanom osobom iz prethodnog stava se smatra društvo:

- koje ima istog vlasnika i/ili suvlasnika kao podnositelj zahtjeva,
- kojem je podnositelj zahtjeva vlasnik/suvlasnik,
- koje je vlasnik/suvlasnik podnositelja zahtjeva,
- čiji je vlasnik/suvlasnik bračni drug ili lice koje živi u istom domaćinstvu sa vlasnikom/suvlasnikom podnositelja zahtjeva i
- koje ima zajedničke članove nadzornog odbora i/ili uprave sa podnositeljem zahtjeva.

Neprihvatljivim troškovima i ulaganjima po ovom Programu, smatraju se:

- kupovina potrošne robe, sirovina, repromaterijala i rezervnih dijelova,
- troškovi carinjenja, prevoza i stavljanja u pogon kupljenje opreme,
- troškovi edukacije,
- troškovi laboratorijskih testova,
- troškovi različitih studija i mišljenja i
- troškovi PDV-a.

6. KRITERIJI ZA IZBOR KORISNIKA SREDSTAVA ZA POZAJMLJIVANJE

Pozajmljivanje sredstava po ovom Programu znači kredit obezbijeđen putem Union banke d.d. Sarajevo (u daljem tekstu: Banka), regulisan ugovorom o kreditu, bez/sa odgodom plaćanja („grace“ periodom) do 12 mjeseci.

Korisnici sredstava po ovom Programu mogu biti privredna društva sa sjedištem u Federaciji Bosne i Hercegovine čija je primarna djelatnost definisana djelatnostima proizvodnje u sektorima navedenim u tački 5. ovoga Programa, te da zapošljavaju najmanje 20 zaposlenika.

Korisnici sredstava po ovom Programu mogu biti i privredna društva kojima su dodijeljena sredstva po osnovu programa Trajnog revolving fonda Ministarstva u prethodnim godinama (2014., 2015. i 2016. godina) i koja se nalaze u procesu povrata kredita, na način da zaduženje na dan podnošenja zahtjeva, tj. postojeći dug po prethodnom kreditu i traženi iznos sredstava po Programu za 2017. godinu, u zbiru nije veći od 500.000,00 KM.

Privredna društva koja apliciraju za dodjelu sredstava trebaju imati slobodan kolateral kako bi se Federalno ministarstvo energije, rudarstva i industrije (u daljem tekstu: Ministarstvo) u C-teretnom listu, moglo upisati, isključivo, kao založni povjerilac I reda i u registru zaloga kao založni povjerilac I reda. Korisnici sredstava po ovom Programu mogu biti samo ona privredna društva koja su prema mišljenju Banke o bonitetu klijenta ocijenjena sa „pozitivno“.

Napomena:

- ne uzimaju se u razmatranje privredna društva koja su prema mišljenju Banke o bonitetu klijenta ocijenjena sa „negativno“ i „bez mišljenja“, kao i privredna društva kod kojih se Ministarstvo ne može upisati u C-teretnom listu kao založni povjerilac I reda.

Korisnici ne mogu biti privredna društva:

- u stečaju ili u postupku likvidacije,
- koja imaju nepodmiren dug prema federalnim i državnim institucijama, osim ako isti nije reprogramiran važećim dokumentom,
- koja ne ispunjavaju uslove za otvaranje transakcijskog računa kod Banke,
- koja bez prekida posluju kraće od 6 mjeseci i/ili ne posjeduju zvanične finansijske izvještaje,
- koja imaju iskazan gubitak iznad visine kapitala prema posljednjem zvaničnom bilansu stanja,
- čiji kapital prema posljednjem zvaničnom bilansu stanja ima vrijednost nižu od iznosa traženog kredita i
- koja prema CRK izvještaju Centralne Banke Bosne i Hercegovine imaju tekuće plasmane u finansijskim institucijama u kategoriji lošijoj od B (osim u slučaju da obezbijede dokaz o urednom izmirivanju obaveza).

Kreditna sredstva se dodjeljuju u skladu sa Zakonom o sistemu državne pomoći („Službene novine Federacije BiH“, broj 10/12) i Uredbom o namjeni, kriterijima i uslovima za dodjelu državne pomoći u Federaciji BiH („Službene novine Federacije BiH“, broj 99/13), odnosno po pravilima za dodjelu državne pomoći male vrijednosti

(*de minimis* državna pomoć), kojima je definisano da se *de minimis* državna pomoć može dodijeliti pojedinačnom privrednom društvu u visini do 200.000 €, u bilo kom periodu u toku tri uzastopne fiskalne godine.

Državnu pomoć po ovom Programu čini samo iznos kamate koji nastaje kao razlika između referentne kamatne stope i stope po kojoj je odobren kredit, odnosno koja je definisana Programom (0,9%). *De minimis* državna pomoć ne može se dodijeliti između ostalog privrednim društvima u teškoćama i za podsticanje izvoza.

7. SREDSTVA PREDVIĐENA ZA POZAJMLJIVANJE

Sredstva predviđena za pozajmljivanje po ovom Programu, čine:

- sredstva koja će mjesečno biti alocirana na račun Trajnog revolving fonda u Banci od povrata glavnice dodijeljenih kreditnih sredstava realizovanih putem Razvojne banke Federacije Bosne i Hercegovine (očekivani iznos sredstava prema procjeni Razvojne banke mjesečno iznosi cca 50.000,00 KM).
- sredstva koja se prikupljaju od otplate glavnice plasiranih kredita putem Union banke d.d. Sarajevo i koja će se prikupljati u toku 2017. godine, a po osnovu kreditnih zaduženja iz programa utroška sredstava Trajnog revolving fonda za period 2014-2016 godina (očekivani iznos sredstava prema procjeni Banke mjesečno će iznositi cca 300.000,00 KM - 500.000,00 KM);
- saldo sredstava zatečenih na računu u Banci na dan 28.02.2017. godine u iznosu od 158.009,28 KM, kao i odobrena a neuplaćena sredstva Budžeta Federacije Bosne i Hercegovine za 2016. godinu u iznosu od 6.000.000,00 KM, umanjena za iznos obaveza iz 2016. godine (sredstva koja će biti eventualno dodijeljena privrednim društvima čija se dokumentacija nalazi u proceduri ocjene u Banci);

Isplata kreditnih sredstava za korisnike kredita po Programu za 2017. godinu će se vršiti sukcesivno, odnosno onom dinamikom kako se sredstva budu prikupljala na račun Trajnog revolving fonda otvorenog u Banci.

Navedena sredstva su kreditnog karaktera, sa:

- odgodom plaćanja („*grace*“ periodom) do 12 mjeseci,
- godišnjom kamatnom stopom u visini 0,9% i
- naknadom za obradu kredita - jednokratno u visini 0,5%.

Naprijed navedene troškove snosi korisnik sredstava. Naplaćena redovna kamata i naknada za obradu kredita predstavljaju prihod Banke za komisioni posao.

Naknada za obradu kredita se plaća unaprijed iz odobrenih kreditnih sredstava korisnika u visini 0,5%.

Dodijeljena sredstva korisnici vraćaju u minimalno 24, a maksimalno u 60 jednakih mjesečnih anuiteta. U broj anuiteta se ne uračunava „*grace*“ period. Početak povrata kredita, dinamika vraćanja, kao i drugi bitni elementi kredita bit će definisani ugovorom koji korisnik kredita sklapa sa Bankom.

Dodijeljena sredstva isključivo će se isplaćivati na račune korisnika kredita kod Banke, čime će se omogućiti i kontrola utroška dodijeljenih sredstava.

Sredstva za provođenje Programa odobravati će se u visini novčanih sredstava na način kako je to dato u Tabeli 1. Tako će najniži iznos kreditnih sredstava koji se dodjeljuje privrednim društvima iznositi 100.000,00 KM, dok će najviši iznos biti 500.000,00 KM.

Tabela 1

Visina dodijeljenih sredstava u KM	Odgoda plaćanja (grace period) u mjesecima do	Broj anuiteta (mjesečnih) vraćanja sredstava
100.000,00 – 500.000,00	12	24-60

Kreditna sredstva moraju biti obezbijeđena minimalno:

- mjenicama Korisnika sredstava (dužnika) i mjenicama vlasnika Korisnika sredstava (u slučaju da 50% ili više vlasništva pripada jednom licu, osim za preduzeća u većinskom državnom vlasništvu) i
- založnim pravom na nekretnine ili kombinacijom založnog prava na nekretninama i zaloga na pokretnim stvarima – opremu, odgovarajuće vrijednosti ustanovljene na osnovu procjene stalnog sudskog vještaka odgovarajuće struke (definisano u nastavku).

Vrijednost nekretnina koje se uzimaju kao kolateral mora biti minimalno u omjeru 1,5:1 u odnosu na iznos kredita, osim ukoliko se radi o kombinaciji založnog prava na nekretninama i zaloga na pokretnim stvarima.

Ukoliko se radi o kombinaciji založnog prava na nekretnine i zaloga na pokretne stvari, ukupna vrijednost kolaterala mora biti minimalno 2:1 u odnosu na iznos kredita uz uslov da vrijednost nekretnina mora biti minimalno 1,25:1 u odnosu na iznos kredita.

Ukoliko je namjena kredita nabavka opreme odnosno pokretnih stvari, obavezno je da se iste zalažu kao dodatni kolateral uz obavezni kolateral (vrijednost dodatnog kolaterala ne ulazi u gore definisane omjere vrijednosti kolaterala i iznosa kredita).

8. TRAJANJE PROGRAMA

Program traje do utroška sredstava, odnosno do dana usvajanja Budžeta Federacije Bosne i Hercegovine za 2018. godinu.

Aktivnosti vezane za donošenje i realizaciju Odluka i Rješenja o dodjeli kreditnih sredstava za privredna društva, a koje su započete po Programu za 2016. godinu, traju do konačne realizacije istih.

9. TIJELA NADLEŽNA ZA PROVOĐENJE PROGRAMA

Tijela nadležna za provođenje i nadzor nad namjenskim korištenjem sredstava po ovom Programu su Ministarstvo, Federalno ministarstvo finansija/financija i Banka, svako u okviru svoje nadležnosti, u skladu s Ugovorom o komisionim poslovima zaključenim između Ministarstva i Banke.

Ministarstvo ima pravo uvida i kontrole u postupku provođenja odobrene investicije na lokaciji korisnika.

U svrhu kontrole namjenskog korištenja dodijeljenih sredstava korisnik je dužan provesti odobrenu investiciju u cijelosti, u skladu sa donesenim Rješenjem i potpisanim Ugovorom, te dostaviti Ministarstvu Izvještaj o provođenju odobrene investicije sa prikazom očekivanih učinaka investicije, i to najkasnije 3 mjeseca nakon dodjele sredstava.

10. PROVOĐENJE PROGRAMA

Sredstva se dodjeljuju na osnovu raspisanoga Javnog poziva u kojem će se jasno definisati uslovi za prijavu na Javni poziv, kriteriji za vrednovanje zahtjeva privrednih društava, način razmatranja prijava kao i spisak potrebne dokumentacije koju je potrebno priložiti uz zahtjev za dodjelu sredstava, a prema sljedećem rasporedu:

- Dokumentacija na obrascima Banke (preuzeti sa web stranice Union banke d.d. Sarajevo: www.unionbank.ba):
 - Zahtjev za kredit,
 - Karton deponovanih potpisa,
 - Popunjen upitnik o povezanim licima,
 - Saglasnost za pristup podacima iz centralnog registra kredita,
 - Izjava ovlaštenoga lica o nepostojanju računa nad kojim je određena mjera zabrane raspolaganja novčanim sredstvima,
 - Pregled postojećih kreditnih obaveza s informacijama o namjeni i obezbjeđenju i
 - Poslovni plan koji uključuje i plan investiranja s efektima utroška sredstava (ukoliko se poslovnim planom proiciraju prihodi koji su veći u odnosu na prethodnu godinu i/ili prosjek prethodne 3 godine za više od 10%, potrebno je da proicirani prihodi i njihova izvjesnost bude adekvatno dokumentovana i precizno obrazložena).

- Dokumentacija potencijalnih Korisnika kredita:
 1. Rješenje o upisu u sudski registar sa svim izmjenama i dopunama,
 2. Aktuelni izvod iz u sudskog registra (ne stariji od 30 dana),
 3. Statut i odluka/akt o osnivanju,
 4. Uvjerenje o poreznoj registraciji kod Porezne uprave – ID broj,
 5. Uvjerenje o registraciji obveznika poreza na dodatnu vrijednost – PDV broj,
 6. Obavještenje nadležnog zavoda za statistiku o razvrstavanju prema djelatnosti,
 7. Uvjerenja nadležne organizacione jedinice Porezne uprave/UIO da nema neizmirenih obaveza po osnovu javnih prihoda,
 8. Identifikacioni dokument osnivača ukoliko se radi o dioničkom društvu,
 9. Lične karte i CIPS potvrde o prebivalištu lica ovlaštenih za zastupanje,
 10. Zvanični finansijski izvještaji za posljednje tri godine (podrazumijeva godišnje i polugodišnje finansijske izvještaje - ukoliko je društvo obavezno vršiti prijavu polugodišnjih izvještaja); ukoliko je privredno društvo osnovano u periodu koji je kraći od tri godine, potrebno je dostaviti finansijske izvještaje za cjelokupni period poslovanja,
 11. Analitički bruto bilans,
 12. Pregled potraživanja od kupaca,
 13. Pregled obaveza prema dobavljačima,

14. Dokumentacija u vezi sa imovinom koja se nudi kao obezbjeđenje kredita:
- procjena sudskog vještaka (ne starija od šest mjeseci),
 - ZK izvadak i kopija katastarskog plana/posjedovnog lista sa identifikacijom parcela novog i starog premjera (ne stariji od 30 dana) i/ili dokumentacija kojom se dokazuje vlasništvo nad pokretnim stvarima i izvod iz registra zaloga
- Napomena: provjeru izvoda iz registra zaloga će vršiti Banka i naplatiti taksu prilikom realizacije kredita,
15. Spisak zaposlenika iz matične evidencije aktivnih osiguranika, izdat od strane nadležne službe ne stariji od 30 dana od dana podnošenja zahtjeva (min. 20 zaposlenika),
16. Ovjerena i potpisana izjava od strane ovlaštenog lica o planiranom broju novozaposlenih radnika u periodu do jedne godine po potpisivanju ugovora o dodjeli kreditnih sredstava, koji će biti zadržani u radnom odnosu najmanje tri godine,
17. Izjava *de minimis*, odnosno izjava kojom privredno društvo dokazuje da u prethodne tri fiskalne godine nije bilo korisnik grant ili kreditnih sredstava, a ukoliko jeste, izjavom treba obavijestiti Ministarstvo o drugim vrstama državne pomoći koje je dobilo u prethodnom trogodišnjem fiskalnom periodu od svih nivoa vlasti (grant sredstva, kreditna sredstva sa subvencionisanom kamatnom stopom, garancije itd.), i
18. Ostala dokumentacija u skladu sa zahtjevima Banke i/ili Ministarstva, kao i dokumenti za koje klijent smatra da su interesantni za Banku.

Napomena:

- svi traženi dokumenti, trebaju biti originali ili ovjerene kopije ne starije od 30 dana od dana podnošenja kreditnog zahtjeva;
 - obrazac izjave pod rednim brojem 17. (izjava *de minimis*), može se preuzeti sa web stranice Ministarstva (www.fmeri.gov.ba);
 - dokumentaciju pod rednim brojevima 11., 12. i 13. u prethodnom stavu treba obezbijediti sa:
- danom dostavljenih posljednjih zvaničnih finansijskih izvještaja i
 - posljednjim danom prethodnog mjeseca u odnosu na dan podnošenja zahtjeva za kredit.

Pismeni zahtjev za dodjelu kreditnih sredstava s ostalom potrebnom dokumentacijom po Javnom pozivu, uvezanom i poredanom po tačkama Javnog poziva, podnosi se Ministarstvu na memorandumu društva, potpisan od strane ovlaštenog lica, sa preciznom namjenom sredstava kredita, iznosom i rokovima otplate kredita, te sa naznakom iz kojeg se industrijskog sektora traže sredstva (Metalna, elektro i automobilska industrija; Industrija građevinskog materijala i nemetala; Drvena, papirna i grafička industrija; Proizvodnja tekstila, odjeće kože i obuće; Hemijska i farmaceutska industrija i industrije gume i plastike).

Podnositelj može podnijeti u toku važeće, budžetske godine više od jednog zahtjeva, ukoliko mu po prethodnom zahtjevu nisu odobrena kreditna sredstva.

Zahtjevi za kreditna sredstva koji su veći od maksimalnog predviđenog iznosa iz ovog Programa, smatrati će se formalno neispravnim i neće se uzeti u razmatranje.

U cilju provođenja postupka dodjele sredstava na osnovu podnesenih zahtjeva, federalni ministar energije, rudarstva i industrije Rješenjem imenuje Komisiju za

utvrđivanje prijedloga sa rang listom korisnika dijela sredstava utvrđenih u razdjelu 17. Budžeta Federacije Bosne i Hercegovine za 2017. godinu Federalnom ministarstvu energije, rudarstva i industrije „Izdaci za finansijsku imovinu–Ostala domaća pozajmljivanja–Trajni revolving fond“ (u daljem tekstu:Komisija), koja se sastoji od tri člana iz Ministarstva.

Postupak dodjele kreditnih sredstava predstavlja sveobuhvatni postupak odabira zahtjeva za dodjelu sredstava i sastoji se od sljedećih faza:

- 1) Zaprimanje zahtjeva,
- 2) Administrativna provjera formalne ispravnosti dostavljenih zahtjeva,
- 3) Ocjena boniteta klijenta i pravno mišljenje o ponuđenom kolateralu,
- 4) Odluka o davanju prethodne saglasnosti na prijedlog Rješenja o dodjeli kreditnih sredstava sa dostavljenim mišljenjima od strane relevantnih institucija, dostavlja se Vladi Federacije BiH na odlučivanje i objavljuje u „Službenim novinama Federacije BiH“ kao i na web stranici Ministarstva,
- 5) Donošenje Rješenja o dodjeli kreditnih sredstava uz objavu istog u „Službenim novinama Federacije BiH“,
- 6) Potpisivanje Ugovora o dodjeli kreditnih sredstava i prenos novčanih sredstava.

Zahtjevi za dodjelu kreditnih sredstava se u fazama 1 i 2 obrađuju prema datumu zaprimanja i prosljeđuju u Banku na dalje postupanje (faza 3).

Neuspješni podnosioci zahtjeva za dodjelu kreditnih sredstava po svim fazama će biti obaviješteni u pisanom obliku, uz navode razloga za odbijanje.

Javni poziv po ovom Programu biti će raspisan nakon usvajanja Programa od strane Vlade Federacije Bosne i Hercegovine i bit će otvoren do utroška sredstava, a najkasnije do dana usvajanja Budžeta Federacije Bosne i Hercegovine za 2018. godinu.

Komisija će najmanje jednom mjesečno, a po potrebi ili prema procjeni predsjednika Komisije i više puta mjesečno, vršiti pregled pristiglih zahtjeva za dodjelu sredstava, s ciljem utvrđivanja formalne ispravnosti istih. Komisija će pri izboru korisnika poštovati osnovne principe kao što su jednako postupanje, nediskriminacija, povjerljivost i transparentnost. Nakon svakog sastanka, Komisija sačinjava zapisnik.

Listu formalno ispravnih zahtjeva za dodjelu sredstava usklađenih sa uslovima definisanim Programom, sa pripadajućim priložima, Komisija će dostaviti Banci na ocjenu rizika.

Nakon što Ministarstvu bude dostavljeno mišljenje Banke o bonitetu podnosilaca zahtjeva i procjena kolaterala, Komisija će na osnovu Programom utvrđenih kriterija i svojih internih akata, sačiniti Prijedlog sa rang listom pojedinačnih zahtjeva i sa predloženim iznosima novčanih sredstava za dodjelu i dostaviti ih federalnom ministru energije, rudarstva i industrije.

Napomena:

- ukoliko se u momentu sačinjavanja liste potencijalnih korisnika kreditnih sredstava, na računu Trajnog revolving fonda kod Banke ne nalazi dostatan iznos novčanih sredstava za realizaciju kredita, obzirom da se sredstva prikupljaju sukcesivno, Komisija će sačiniti „listu čekanja“ hronološkim redoslijedom onako kako u Ministarstvo budu pristizale procjene „o bonitetu“ iz Banke.

Federalni ministar energije, rudarstva i industrije će, na osnovu dostavljenog Prijedloga rang liste pojedinačnih projekata sa dodijeljenim iznosima novčanih sredstava, uputiti Prijedlog odluke Vladi Federacije Bosne i Hercegovine o davanju prethodne saglasnosti na pojedinačna rješenja korisnika kreditnih sredstava.

Banka će na osnovu donesenih i objavljenih odluka i rješenja vršiti ugovaranje sa korisnicima sredstava u skladu sa bankarskom procedurom, u roku do 60 dana od dana objave rješenja u „Službenim novinama Federacije BiH“. U protivnom, odluke i rješenja se stavljaju van snage.

11. POSLOVNI ODNOS IZMEĐU FEDERALNOG MINISTARSTVA ENERGIJE, RUDARSTVA I INDUSTRIJE I UNION BANKE D.D. SARAJEVO

Ministarstvo i Banka svoje poslovne odnose uredili su Ugovorom o komisionim poslovima broj: 07-14-564-1/14 zaključen dana 15.04.2014. godine, Aneksom I Ugovora o komisionim poslovima broj 07-14-564-1-1/14 zaključen dana 22.12.2014. godine i Ugovorom o uspostavljanju Trajnog revolving fonda broj: 07-14-564/14 zaključen dana 15.04.2014. godine.

12. KONTROLA UTROŠKA POZAJMLJENIH SREDSTAVA

U svrhu kontrole utroška pozajmljenih sredstava, Ministarstvo će imenovati Komisiju za kontrolu namjenskog utroška sredstava Trajnog revolving fonda kod Union banke d.d. Sarajevo za dugoročno finansiranje projekata putem dodjele kredita za 2017. godinu nezavisno od Banke. Ova Komisija vrši provjeru korištenja odobrenih sredstava obilaskom korisnika i njegovih poslovnih objekata, te uvidom u dokumentaciju na osnovu koje je ostvaren kredit.

Naprijed pomenuta Komisija radi u skladu sa Programom i Javnim pozivom te svojim internim aktima i dužna je sačiniti Zapisnik o utrošku sredstava za svako privredno društvo u kojem je vršena kontrola utroška sredstava na lokaciji korisnika kredita. Izvještaj o utrošku sredstava za 2017. godinu će se putem Ministarstva dostaviti Vladi Federacije Bosne i Hercegovine.

13. OBJAVLJIVANJE AKTA

Ministarstvo će ovaj Program, Odluku o usvajanju Programa i Odluku o izboru korisnika kreditnih sredstava po Programu utroška sredstava Trajnog revolving fonda kod Union banke d.d. Sarajevo, Federalnog ministarstva energije, rudarstva i industrije za dugoročno finansiranje projekata putem dodjele kredita za 2017. godinu,

objaviti u „Službenim novinama Federacije BiH“ i na web stranici Ministarstva: www.fmeri.gov.ba

Ministarstvo će Javni poziv za kandidovanje Programa utroška sredstava Trajnog revolving fonda kod Union banke d.d. Sarajevo, Federalnog ministarstva energije, rudarstva i industrije za dugoročno finansiranje projekata putem dodjele kredita za 2017. godinu, objaviti u dnevnoj štampi „Večernji list“ i „Dnevni avaz“, te u „Službenim novinama Federacije BiH“, kao i na web stranici Ministarstva: www.fmeri.gov.ba

MINISTAR

Nermin Džindić